

La scheffa d'egualitad da Turitg

Ina Grischuna maina il biro d'egualitad dal chantun

■ (anr/vi) **Gia durant il gimnasi a Cuira era l'egualitad in tema per Kathrin Arioli. Che quai daventia in di sia professiun, n'ha ella betg sminà. Uss lavura Arioli gia 14 onns en il biro d'egualitad che s'occupa da l'entir chantun da Turitg, pia era da la cham-pagna.** Dacurt saja ella sa dumandada cura ch'ella saja vegnida sensibilisada per l'egualitad. Las dunnas giuvnas d'ozendi na resentian betg pli il dischequilibrer tranter umens e dunnas, di Arioli. Las giuvnas sa bajegian sin la lescha che garantisce l'egualitad. Pir pli tard sa fetschian ellas en che la realitad saja in'otra. Arioli sa regorda ch'ella e sia amia eran attentas gia sco gimnasiastas e discutavan en il «Kaffeestübli» a Cuira sur dals dretg da las dunnas. Bleras chaussas haja ella dentant fastisà pir pli tard. P. ex. che umens discurren adina pli ditg che dunnas, u quant malgulivas che las pussaivladads da far carriera èn.



Kathrin Arioli, scheffa dal biro d'egualitad, lavura per l'equiliber tranter dunnas ed umens.

FOTO ALESSANDRO DELLA BELLA / TAGES-ANZEIGER

Dissertaziun davart quotas

Betg gist inchantà era il professor d'Arioli cura ch'ella ha ditg ad el ch'ella fetschia sia dissertaziun da giurisprudenza davart quotas da dunnas. Quest tema vegniva gist discutà en Germania ed interessava la giuvna giurista. Arioli ha tuttina dastgà scriver sur da la basa giuridica da quotas, ma l'interess dal professor per sia dissertaziun è stà marginal.

E tge pensa Arioli oz da quotas? Ellas fissan il med il pli efficient per cuntanscher che umens e dunnas èn representents a moda guliva. Ma quotas sajan da preschent malvesidas. Ch'i dat en il management aut gnanca diesch perschient dunnas, mussia dentant bain avunda ch'insatg na funcziunia betg.

Cun bus en regions purilas

Il 1990 ha il chantun da Turitg avert il biro d'egualitad e dapi lura è Arioli da la partida. Ella s'occupa da dumondas giu-

ridicas. Sch'il cussegl chantunal tracta ina lescha, prenda Arioli sut la lupa quella e fa propostas. En la lescha da submitiun stat perquai scrit ch'il chantun dastga surdar lavurs sulet a firmas che pajan las dunnas tuttina bain sco ils umens.

In auter exempel da la pratica: Pèrs che levan pli baud la schlatta da la dunna sco num da famiglia, stuevan far valair: U che l'um ha in fitg trid num u che la dunna ha ina schlatta che mora ora. Il biro ha cuntanschì ch'era l'egualitad vegn acceptada sco argument per prender la schlatta da la dunna sco num da famiglia.

In dals bels projects saja stà il bus da biblioteca, raquinta Arioli. Ina da sias collegas haja fatg la patenta d'ir cun camiun, il biro haja cumprà in vegl bus, laschà colurar quel da studentas e drizzà en ina biblioteca. Cun la «biblioteca» èn

las dunnas d'egualitad viaggiadas tras l'entir chantun ed han emprendì d'enconuscher las regions purilas da Turitg.

Canortas era cun paucs daners

Dapi tschintg onns è Arioli uss scheffa dal biro. Ella s'occupa anc adina da dumondas giuridicas. Ma dasperas datti bler auter: Arioli prenda part a la maisa radunda cunter il commerzi cun dunnas. Ella gida era a crear in med per controlar pajas dad umens e dunnas tar firmas ch'obtegnan lavur dal chantun.

«La cumpatibilitad da famiglia e clamada» è il problem etern da las dunnas. Era qua emprova il biro da fullar via: Dacurt ha el publitgà tgeninas vischnancas da Turitg che porschan la meglra tgira d'uffants. La statistica ha dà notas per canortas, per temps da bloc, per purschidas da gentar euv. Uschia pon familias guardar, nua ch'igl è il pli per-

dert da sa domiciliar. Las vischnancas vegnan uschia en concorrenza ina cun l'otra en la dumonda: Tgi porscha las meglras cundiziuns per familias giuvnas?

La statistica ha leventà emeziuns tar vischnancas cun schletas notas. Bleras reacziuns sajan era stadas positivas, raquinta Arioli. Il pli interessant è: «La retschertga ha mussà ch'era vischnancas cun paucs daners èn pipa da porscher ina buna tgira.»

«Il mender è d'esser persula»

L'infrastrucutra da canortas en ina citad garantisce dapli libertad ad ina dunna. Ella ha pli simpel da gudagnar ils agens daners e da s'avischinar a l'egualitad. Tgenins tips dat Kathrin Arioli ad ina dunna che viva en ina vischnanca nua ch'i na dat betg canortas e nua ch'i na dat magari betg tanta chapientscha per politica e dretgs da dunnas?

Barattar ora tips

«Igl è impurtant da far curaschi ina a l'otra», di Arioli. Ins sto chattar autras dunnas u umens che han sumegliantas opiniuns. «I na dat nagut mender che d'adina esser persula cun quai ch'ins fa.» Lura mettian ins adina en dumonda sazez e perdia cun il temp il curaschi. Perquai dovrian ins raits da contact. Quai na stoppian betg esser uniuns. Ma i na tanschia era betg da be baterlar al telefon cun amias. Ins stoppia tschertgar alianzas nua ch'ins po barattar experientschas en il stil: Vul ti era lavurar? Co has ti organisà da puspè ir a lavurar? Co ha quai funcziunà?

Far prender posiziun

Impurtant è era da sa maschadar en la vita publica e prender part a radunanzas da vischnanca. Ella conceda era: «Jau na sun betg naiva. Sch'ina dunna ha uffants

pitschens, èsi grev da s'engaschar en la politica.» Ma i tanschia gia da pledentar politichers locals e dumandar els tge ch'els pensian da tschertas dumondas da dunnas, u sch'els fissan pronts da s'engaschar per ina purschida da gentar per uffants da scola. Uschia possian ins eruir a tgi ch'ins po dar la vusch.

Il futur da las figlias

Il futur da las figlias è en ils egl d'Arioli medemamain insatge nua ch'ins po far bler per l'egualitad. Che quai vegn savens negligì è sa mussà en ina retschertga: Il biro ha dumandà geniturs quant temp ch'els prendian per gidar ils uffants a tscherner ina professiun. Il resultat da la retschertga saja stà sorprendente. I vegn duvrà bler pli pauc temp per las figlias che per ils figls. Ils babs s'occupian gugent dals figls, ma be darar dal futur da las figlias. Uschia restian las dunnas trasora pendidas vi da las clamadas tradiziunals. Qua vesa Arioli anc in grond potenzial ed ina schanza per las figlias e dunnas dal futur.

Curt e bun

Naschida: ils 16 d'avrigl 1963

Creschida si: a Cuira

Burgaisa: da Basilea

Domicil: Turitg, circuit 6

Uffants: in mat da 12 ed ina matta dad 8 onns

Spaisa preferida: tuttas variantas da spaghettis

Bavronda preferida: vins austriacs

Sport: joggen al Züriberg

In'autura preferida: Birgit Vanderbeke

Viadis: gugent en citads europeas sco Vienna, Hamburg, Berlina, Paris.